



Velika akcija Tužilaštva BiH, Uprave za indirektno oporezivanje i SIPA-e

Lijanovići utajili 11,6 miliona m

Četiri brata Ivanković Lijanović, Milorad Bahilj, Lijan-Stipo Ivanković, Venka Ivanković, Jozo Slišković, Željko Mikulić, Zdravko Ivanković, Draženko Kvesić, Miroslav Čolak, Mirjana Šakota i Mirko Galić osumnjičeni su za malverzacije s PDV-om, zloupotrebu poljoprivrednih poticaja i pljačku Federalnih robnih rezervi

Pišu: **Darko Omeragić i Edin Redžić**

Pripadnici Agencije za istrage i zaštitu BiH (SIPA) u srijedu, 10. septembra, po nalogu Tužilaštva BiH u akciji kodnog naziva Brend, odnosno Meso, kako ju je nazvalo Tužilaštvo BiH, zbog sumnje da su počinili porezne prevare teške 11,6 miliona KM, uhapsili su ili stavili pod privremeni nadzor predsjednika Narodne stranke Radom za boljitak i poslanika ove stranke u Predstavničkom domu Parlamenta BiH Mladena Ivankovića Lijanovića (54), te njegovu braću - federalnog ministra poljoprivrede, vodoprivrede i šumarstva i dopremijera FBiH Jerka (45), Jozu (52) i Slavu (57), oca Lijana-Stipu (81), kao i Venku Ivanković (74), te

ministra trgovine FBiH Milorada Bahilja (61), Jozu Sliškovića (58), Željka Mikulića (55), Zdravka Ivankovića (46), Draženka Kvesića (46), Miroslava Čolaka (46), Mirjanu Šakotu (56) i Mirka Galića (60).

Prema posljednjim informacijama koje smo pred zaključenje ovog broja *Dana* dobili od portparola Tužilaštva BiH Borisa Grubešića, za većinu privedenih će od Suda BiH biti zatraženo određivanje pritvora, dok se za tri osobe (najvjerovatnije Venku i Lijana-Stipu Ivankovića i još jednu osobu) pritvor neće tražiti i oni će se braniti sa slobode.

Akciju je na području Sarajeva, Mostara i Širokog Brijega izvelo više stotina pripadnika SIPA-e i Uprave za indirektno oporezivanje BiH u saradnji sa policajcima Zapadnohercegovačkog i Hercegova-

čko-neretvanskog kantona.

Iz Tužilaštva BiH su saopćili da je riječ o jednom od najsloženijih sudskih predmeta u postdejtonskoj BiH i poreznim utajama u iznosima od preko 11,6 miliona KM koje su između 2007. i 2011. počinjene osnivanjem i kasnijim fiktivnim gašenjem preduzeća, sa ostavljenim velikim dugom za porez. Ova preduzeća su se bavila uvozom, proizvodnjom i preradom mesa i mesnih preradevina.

Tokom akcije pretreseni su objekti firme Lijanovići d.o.o. Široki Brijeg, Kora-fin d.o.o. Široki Brijeg i Velmos company d.d. Mostar.

Nije iz vedra neba

Hapšenje Ivankovića nije došlo kao grom iz vedra neba, jer se provjere traženja povrata PDV-a, firmi koje se mogu dovesti u vezu

Mladen Ivanković Lijanović
doveden u SIPA-u

ili araka?

sa firmom Lijanović d.o.o. vode još od 2009. godine. Ipak, temelji za pokretanje istraga protiv njih udareni su 2011. godine, kada je Uprava za indirektno oporezivanje Tužilaštvu BiH zbog sumnje da su počinjena krivična djela porezne prevare i neplaćanje poreza podnijela prvi izvještaj protiv osoba koje su vodile firme povezane sa glavnom firmom Lijanović d.o.o. U izvještaju koji je podnesen protiv Milorada Bahilja, kao odgovorne osobe u firmi MI-MO Mostar, Venke Ivanković, odgovorne osobe u firmi Farmer Široki Brijeg, Joze Sliškovića, odgovorne osobe u firmi Farmko Široki Brijeg se navodi kako se sumnja da su budžet BiH oštetili za oko pet miliona KM. Ovaj izvještaj je bio temelj za otvaranje istrage, a nakon njega su inspektori UIOBiH 2013. i ove godine Tužilaštvu BiH prosljedili dvije dopune po kojima su ukupne utaje narasle na 11,6 miliona, nakon čega su uslijedila hapšenja.

Zvanično, akcija kodnog naziva Meso počela je u ljeto prošle godine kada su pripadnici SIPA-e

Istražitelji Jerku Ivankoviću pred kućom uručili nalog za hapšenje

Prvi izvještaj prosljedjen je Tužilaštvu BiH 2011. godine, nakon čega su izvršene još dvije dopune osnovnog Izvještaja u toku 2013. i 2014. godine. Tim izvještajima obuhvaćeno je ukupno 20 osoba, od čega 14 fizičkih lica i šest pravnih lica

privremeno izuzeli dokumentaciju od više osoba koje su dovođene u vezu sa poreznim prevarama. Prije nešto više od 12 mjeseci, pripadnici SIPA-e su pretresli ministarski ured Jerka Ivankovića Lijanovića u Sarajevu i prostorije firme Lijanovići d.o.o. u Širokom Brijegu, u kojoj je većinski vlasnik upravo Jerko Ivanković Lijanović. Uprava za indirektno oporezivanje BiH je Lijanoviće 2011. godine prijavila zbog sumnje za utaju poreza u iznosu od pet miliona KM. U istragu su, osim SIPA-e i UIOBiH, bili uključeni i Federalna uprava policije i Granična policija BiH. Taj predmet se, prema posljednjim informacijama, nalazi u ladicama državnih tužilaca.

Nezvanično, braća Jerko i Slavko su glavni osumnjičeni za organizovanje grupe za prevaru koja je preko povezanih firmi utajila ili pogrešno prikazala iznose za povrat PDV-a.

Opseg kriminala

Opseg kriminalnih aktivnosti za koje su osumnjičeni Lijanovići na konferenciji za novinare prezentovala je Kristina Jozić, portparolka SIPA-e, rekavši da su policijski službenici ove agencije započeli opsežnu akciju kodnog naziva Brend 10. septembra u ranim jutarnjim satima na području Sarajeva, Mostara, Širokog Brijega i Gruda. U okviru akcije uhapšeno je 11 osoba zbog postojanja osnovane sumnje da su počinili krivična djela utaje poreza i pranja novca. Jozić je naglasila da su pripadnici organizirane kriminalne grupe osumnjičeni da su preko više pravnih lica osnivali fiktivna preduzeća na koje su u cjelosti prenosili svoju proizvodnju i to na način da naredno pravno lice u kontinuitetu nastavlja obavljati proizvodnju koristeći iste zaposlene osobe, iste prostorije, iste pogone za proi-

zvodnju i to po istoj licenci.

“Utvrđeno je da je navedena organizirana kriminalna grupa nezakonitim aktivnostima stekla protivpravnu imovinsku korist u iznosu većem od 11,6 miliona KM, a koja potiče od neplaćenog i utajenog poreza na dodatnu vrijednost, zatim od nenamjenski trošenih poticaja za razvoj proizvodnje i poljoprivrede, te od prodaje otuđenih zaliha Federalne direkcije za robne rezerve”, istaknula je Jozić, te dodala da je ova grupa, u namjeri da sakrije porijeklo nezakonito stečene imovine, tih 11,6 miliona KM vraćala u legalne finansijske tokove davanjem pozajmica i otkupom udjela od određenih pravnih osoba i uplatom gotovog novca na račune.

Združena akcija

SIPA je u okviru ove akcije pretresla objekte na ukupno 17 lokacija. Pretresima su obuhvaćeni objekti 14 fizičkih i tri pravna lica s ciljem pronalaska i privremenog oduzimanja predmeta koji mogu poslužiti kao dokaz u daljnjem postupku.

Podsjetimo, UIOBiH je u novembru 2011. godine Tužilaštvu BiH prosljedila izvještaj o sumnji u počinjenje krivičnog djela protiv Milorada Bahilja, kao odgovorne osobe u firmi MI-MO Mostar, Venke Ivanković, odgovorne osobe u firmi Farmer Široki Brijeg, Joze Sliškovića, odgovorne osobe u firmi Farmko Široki Brijeg, pod sumnjom da su izvršili krivotvorenje ili uništenje poslovnih i trgovačkih knjiga. Inspektori UIOBiH su u pokušaju da saznaju postoje li pomenute firme kontrolom utvrdili da ih na adresama na kojima su registrovane uopće nema.

U pomenutom izvještaju se navodi da su Venka Ivanović, Bahilj i Slišković osumnjičeni za neplaćanje poreza, čime su budžet BiH

Page: 17

Reach: 0

Country: BOSNIA AND HERZEGOVINA

Size: 1745 cm2


3 / 3

ošteti za oko pet miliona KM. Bahilj je 2011. godine inspektorima UIOBiH tvrdio da od marta 2011. godine više nije izvršni direktor firme MI-MO Mostar i da ne zna gdje se nalazi dokumentacija preduzeća koju su od njega tražili inspektori, kao i da je s tim upoznat Mirko Galić, šef računovodstva u pomenutoj firmi. S druge strane, Galić je inspektorima koji su ga našli u firmi Lijanovići d.o.o. Široki Brijeg izjavio da također ne zna gdje je dokumentacija, ali da će pitati Bahilju. U augustu 2011. godine inspektori UIOBiH su ponovo došli u firmu Lijanovići d.o.o. gdje im je Galić rekao da je tražena dokumentacija bila u arhivi preduzeća, ali da sada ne zna gdje je.

Venka Ivanković je inspektorima koji su kontrolisali rad firme Farmer izjavila da sve poslove oko firme vodi njen sin Damir Ivanković koji je inspektorima kazao da je dokumentacija uništena silom prilika. Inspektorima UIOBiH je preostalo samo da konstatuju kako nisu uspjeli da izvrše kontrolu koju je naložilo Tužilaštvo BiH, te su samo sačinili službenu zabilješku u kojoj su zaključili da su pomenute povezane firme i fizička lica jedni drugima pružali knjigovodstvene usluge, potpisivali ugovore o iznajmljivanju, nakon čega su osnivane i gašene firme, a dugovi za PDV su ostajali neplaćeni.

Nije poznato da li će se istraga protiv Lijanovića proširiti i na druga krivična djela za koja su prijavljivi tokom proteklih godina, među kojima su, naprimjer, i prevara kod dobijanja kredita, za šta ih je prijavila uprava Hypo banke, te za podmičivanje birača tokom izbora 2010, za šta ih je prošle godine prijavila Federalna uprava policije.

Glasnogovornik UIOBiH Ratko Kovačević nam je rekao da je akcija kodnog naziva Meso rezultat rada službenika Uprave za indirektno oporezivanje, koji su u prethodnih nekoliko godina istražili određene nepravilnosti kada je



Šema po kojoj se radilo napravljena je još 2011.

riječ o prometovanju mesa i mesnih preradevina kod nekoliko poreskih obveznika, nakon čega su pripremljeni izvještaji i prosljeđeni Tužilaštvu BiH.

Osnovni i dopunjeni izvještaji

“Prvi izvještaj prosljeđen je Tužilaštvu BiH 2011. godine, nakon čega su izvršene još dvije dopune osnovnog Izvještaja u toku 2013. i 2014. godine. Tim izvještajima obuhvaćeno je ukupno 20 osoba, od čega 14 fizičkih lica i šest pravnih lica, koja se sumnjiče da su počinila veći broj krivičnih djela iz oblasti indirektnih poreza. Procjenjuje se da je budžet BiH oštećen za nešto više od 11 miliona KM, po osnovu sumnje da su počinjena krivična djela organizovanog kriminala, poreske utaje, neplaćanja poreza, pomaganja u činjenu krivičnih djela, krivotvorenja poslovne dokumentacije i uništavanja poslovne dokumentacije. Kroz vremenski period od nekoliko godina, službenici UIO iz Sektora za provođenje propisa i Sektora za poreze, vršili su kontrolne aktivnosti na terenu. Inspektori u Sektoru za poreze vršili su kontro-

lu poslovanja firmi koje su predmet Izvještaja, ali i svih ostalih firmi koje su bile poslovni partneri firmama koje su sastavni dio Izvještaja koji je prosljeđen Tužilaštvu BiH. Vrlo je važno za naglasiti da je UIO spriječila i određene zahtjeve za povrat PDV-a, koje su tražile neke od kompanija koje se nalaze u izvještajima prosljeđenim Tužilaštvu BiH. Uz saradnju sa kolegama iz SIPA-e, a uz vodstvo cijelog predmeta od strane Tužilaštva BiH, krajnji rezultat je privođenje svih osumnjičenih lica”, rekao nam je Kovačević.

Lijanovići su imali posla s pravosuđem i prije 14 godina, ali je Kantonalni sud Sarajevo tada oslobodio krivice Dragana Čovića, predsjednika HDZ-a BiH, koji je kao federalni ministar finansija bio optužen da je donio sporni akt kojim je firmama u vlasništvu Lijanovića omogućeno da izbjegnu plaćanje 1,8 miliona KM carinske takse na uvoz piletime.

Portparol Tužilaštva BiH Boris Grubešić za *Dane* je rekao da će za neke osobe od Suda BiH biti zatraženo određivanje pritvora, dok će se neke osobe, uz mjere zabrane, moći braniti sa slobode.

Od Nade Dalipagić, advokatice Lijanovića, nismo mogli dobiti komentar hapšenja njenih klijenata jer je u trenutku kad su ovi *Dani* otišli u štampariju ona bila na putu u SIPA-u: “Mladen Ivanković i Slavo Ivanković Lijanović prebačeni su u prostorije SIPA-e u Istočnom Sarajevu. Ništa vam drugo zasada ne mogu kazati jer ne znam šta im se tačno stavlja na teret”.

Nermin Nikšić, premijer FBiH

Neka svako odgovara za svoje postupke

“Apsolutno podržavam akcije usmjerene ka sankcioniranju korupcije i organiziranog kriminala u BiH. Neka svako odgovara za svoje postupke, bez obzira na to o kome je ri-

ječ”, izjavio je za Fenu federalni premijer Nermin Nikšić.

Nikšić je dodao da nema nikakve druge informacije u vezi sa akcijom Meso izuzev onoga što se objavljuje u medijima.

“Kada je u pitanju funkcioniranje Vlade FBiH, ono s ovim nije dovedeno u pitanje i Vlada može izvršavati svoje zakonske i ustavne obaveze”, poručio je premijer Nikšić.